



Na David L. Beck
Peresideni Rahi no te Feia Apî Tamaroa

Te Autahu'araa a Aaronā faahiahia

E mea rû te faaotiraa outou i ta outou hopoi'a i te Atua. Te ti'aturi nei au e, e na reira outou.

Te oaoa nei au i teie pô ia parau i te feia apî tamaroa faahiahia o te Ekalesia. Ua haamaitaihia vau i te farereiraa e rave rahi o outou i te ao atoa nei. E au to outou oaoa i te ma'i pee.

Te hi'o nei outou i ta outou mau tauraa ma te puai e te itoito faahiahia. Te faatae atu nei au i to'u here no outou na e to'u ti'aturi ia outou.

Te faauru nei outou i te mau taata ati a'e ia outou hau atu i ta outou e nehenehe e feruri. A faaroo mai na i te mau parau a te hoê tamaiti e ere i ta tatou haapa'oraa, tei tamata i te faaite i te huru o to'na hoa o te mau nei i te Autahu'araa a Aaronā : « Ua ite au i te hoê mea taa ê i roto ia Luis... E ere teie taata mai... te tahi atu mau taata. Te vai ra hoê mea ta oe e ite i roto ia 'na... Aita vau i ite e, eaha râ, tera râ, e mea taa ê oia ia ratou paatoa. Te vai ra hoê mea o ta oe e farii ; e ere (te hoê mea)... ta oe e ite mata. E farii noa oe i reira ».


Te vai ra hoê mea faufaa roa o te faataa ê nei ia Luis e ia outou i te tahi atu mau feia apî tamaroa. Ua farii outou i te Autahu'araa a Aaronā. E horo'a mo'a teie, e e rave rahi o tei ore â e taa maitai nei i to'na faufaa. I teie pô e tauturu vau ia outou ia ite e nahea outou

iho e nehenehe ai e ite i te faahiahia o te Autahu'araa a Aaronā.

I. Te ti'aturi nei te Atua ia outou

I te taime a tuu mai ai te Atua i To'na autahu'araa mo'a i ni'a ia outou, e tapano' o faaite te reira i To'na ti'aturi rahi i ni'a ia outou. Ua ite Oia e, e nehenehe Ta'na e ti'aturi i ni'a ia outou no te faaohipa i te autahu'araa no te tavini ia vetahi ê, mai Ta'na ho'i i ti'aturi i ni'a i te tahi atu mau feia apî ia rave i te tahi mau ohipa faufaa roa Ta'na.

Ei hi'oraa, aita to te ao nei e farii i te faaiteraa puai a te Buka a Moromona no ni'a ia Iesu Mesia ahiri e, aita te Atua i ti'aturi i ni'a i na tamaiti e piti. O Moromona te peropheta i haapoto i teie parau mo'a, 10 ana'e to'na matahiti a faauehia ai oia ia hi'o maite, e i muri a'e ra, ia papa'i i te aamu o to'na



nunaa. 15 to'na matahiti, « i arohahia'i au e te Fatu, e ua tamata vau e ua ite ho'i i te maitai no Iesu ra » (Moromona 1:15).

Na Iosepha Semita i iriti e i nene'i i te Buka a Moromona, e ua piihia oia i ta'na ohipa rahi i te 14raa o to'na matahiti, a haere mai ai te Metua i te Ao ra e o Iesu Mesia e farerei ia'na.

Ua na ô mai te peresideni Thomas S. Monson e : « E ohipa rahi o te tia'ihia nei ia outou... Mai te hoê ta'i pu ra ia tae mai te parau a te Fatu ia outou na, ia'u nei, e i te mau taea'e o te autahu'araa i te mau vahi atoa : 'No reira, i teie nei a tuu atu i te mau taata atoa ia haapii mai i ta'na iho ohipa, e ia rave ho'i i te ohipa i roto i te toro'a tei faataahia no'na ra, ma te itoito atoa' » (« Te piiraa no te itoito », *Liabona*, Me 2004, 54, 57).

II. Te faanahonahoraa apî o te Hopoi'a i te Atua

No te tauturu ia outou ia pahono i te reira piiraa rû, te tuu atu nei te Ekalesia i te hoê faanahonahoraa apî no te Hopoi'a i te Atua, mai tei faaarahia e te peresideni Henry B. Eyring i na'ua nei. Te oaoa nei au no teie faanahonahoraa. E haponohia'tu te mau buka i to outou mau episekopo ra e te mau peresideni amaa i te ava'e tiunu. E haamata outou i te faaohipa i te reira i te taime iho a farii ai outou.

Ei diakono, haapii e ei tahu'a, e amui atu outou i roto i te mau ohipa o te tauturu ia outou ia patu i te puai pae varua e ia haapii e ia faaoti i ta outou mau hopoi'a no te autahu'araa. E pee te mau ohipa tata'itahi i teie hoho'a ohie roa :

Na mua roa, e **haapii** outou i te hoê parau tumu o te evanelia e aore râ, te hoê hopoi'a o te autahu'araa. E ite outou e, eaha ta te Metua i te Ao ra e hinaaro ia rave outou, e e tautoo outou no te farii i te iteraa pae varua no ni'a i te tumu i riro ai ei mea faufaa.

I muri iho, e hamani outou i te mau faanahoraa no te **haa** i ni'a i te mau mea ta oe i apo mai. Te faaitoitohia'tu nei outou ia haamau i ta outou mau faanahoraa i ni'a i to outou mau hinaaro, to outou huru oraraa, e ta outou mau rave'a no te tavini ia vetahi ê. Teie

te hoê taime nehenehe roa ia amo i te hopoi'a no to outou iho tupuraa i te rahi, e te faahoturaa i te ti'aturiraa ia outou iho i te pae varua.

I muri iho e faaite outou i te mau mea ta outou i apo mai e i rave i piha'i iho ia vetahi ê. Mai te mea e, e rave outou i te reira, e haapuai te reira i to outou iteraa papû e e patu ho'i outou i te faaroo i roto i te mau taata ati a'e ia outou. E faarahi outou i to outou aravihi ia paraparau i te evanelia ia vetahi ê.

Te mauruuru nei au i te hoê tamaiti tei faaite mai ia'u i teie iteraa i muri nei. Ua faauehia oia e te tahi atu taea'e o te Autahu'araa a Aarona ia hopoi i te oro'a mo'a na te hoê taata e faaea noa ra i te fare e tei ma'ihia. Ua tae atu raua i to'na fare ma te ite ore e, na roto i te tahi mau utuuturaa a te taote, aita ia e ti'a ia'na ia amu i te tahi mau huru maa – noa'tu te hoê tapu faraoa na'ina'i roa o te oro'a mo'a. Ia oti te faraoa i te haamaitaihia, ua horo'a atu ra teie tamaiti i te oro'a i teie taata paruparu. Ua rave a'e ra oia i te hoê tapu iti o te faraoa haamaitaihia, faaea ihora maa taime iti, e tuu atu ra i ni'a i to'na na utu. Te parau ra teie tamaiti e, i to'na iteraa i teie taea'e faaroo ia faaite i to'na faatura i te oro'a mo'a, ua mana'o oia e, te hi'o ra oia ia'na, mai te huru e, te apa ra i te avae o te Faaora. E nehenehe ta'na e parau e, ua here mau oia ia'na.

Ua puta roa te auraa o te oro'a mo'a i roto i teie tamaiti i taua mahana ra, e eita ho'i e mo'e-faahou-hia ia'na. E roaa atoa ia outou te mau iteraa mo'a mai to teie tamaiti te huru.

E ohipa faufaa roa ta to outou mau metua, te feia faatere e te mau melo o te pûpû i roto i te faanahonahoraa o te hopoi'a i te Atua. I roto i ta outou mau pureraa autahu'araa i te sabati, e roaa ia outou te mau rave'a no te apo, no te haa e no te faaite. Na teie faanahonahoraa apî o te Hopoi'a i te Atua e arata'i ia outou i roto i to outou tere no te faaoti i ta outou ohipa i te Atua e ia ite i te faahiahia o te Autahu'araa a Aarona.

III. Faaoti i ta outou Hopoi'a i te Atua

I te matahiti i ma'iri a'e nei, ua rave au i te hoê ohipa tei tau hope roa i to'u mana'o no ni'a ia outou e no ni'a i te Autahu'araa a Aarona. Te oaoa nei



au ia itehia ia outou iho te mea tei itehia e au. E haapii mai outou e, no te aha te Autahu'araa a Aarona i riro ai ei ohipa faufaa roa i roto i to outou oraraa, e eaha to'na faufaa no te Ekalesia. E oaoa outou ia ite e, no te aha i parauhia ai e, na « upoo rahi » o te autahu'araa (hi'o PH&PF 107:6). E rahi atu to outou haroaroaraa i te auraa o te mau taviri o te autahu'araa, te utuuturaa a te mau melahi, e te evanelia faaineine (hi'o PH&PF 13; 84:26).

E imi Satane i te rave'a ia mana'o outou e, e mea apî roa outou e aore râ, e mea iti roa outou no te rave i te mau ohipa rarahi i te Autahu'araa a Aarona. Ua hape roa te reira.

Te mau parau ta te Atua i parau ia Mose ra, no outou atoa ia i teie mahana, « e, inaha, e tamaiti oe na'u, ... e e ohipa ta'u na oe » (Mose 1:4, 6).

Ua horo'a mai Oia ia outou i To'na mana no te rave i te mau mea rarahi. Mai te mea e, e faaoti outou i ta outou Hopoi'a i te Atua, e haapuai e e haamaitai ia outou i to outou utuafare. Teie ta outou ohipa autahu'araa rahi a'e. A faaroo na i te hoê metua vahine i te faaiteraa i te mea ta ta'na tamaiti i faatupu i ni'a i to'na utuafare : « O Leo tei mau i te autahu'araa i roto i to matou utuafare, e ua riro ia ei haamaitairaa rahi roa. Ua riro oia ei hi'oraa maitai no to'na mau taea'e ; ... e ara oia ia pure tamau noa ratou. E opere oia i te oro'a mo'a i te sabati. E hi'o noa to'na mau teina ia'na. E tauturu oia... i te pureraa utuafare. Ua ite au e,

e tamau noa oia i te riro ei haamaitairaa a tupu ai oia i te paariraa. E nehenehe ta'na e bapetizo i to'na teina taea'e . Ua riro te reira ei tamahana-hana e ei horo'a no matou ».

Mai te mea e, e rave outou i ta outou hpoi'a i te Atua, e haere ia outou e farerei i to outou mau hoa e ere i ta tatou haapa'oraa, e e tauturu ho'i i te faaineineraa ia ratou ia tomo mai i roto i te Ekalesia. Mai te au i te hoê taea'e papû, e ara outou i ni'a iho ia ratou e e haapuai ia ratou. E haere outou e faaora i te tahi atu mau tamaiti tei hahi ê to ratou e'a.

Mai te mea e, e faaoti outou i ta outou hopoi'a i te Atua, e riro ia outou ei faaururaa no te maitai i te mau taime atoa e i roto i te mau huru atoa o te oraraa. To outou hi'oraa parau-ti'a e ta outou ohipa taviniraa autahu'araa maitai, e riro te reira ei rave'a puai no te titau i te mau taata atoa tei matau ia outou ia haere mai i te Mesia ra.

I te taime a fifi roa ai ratou, ua hi'o te mau Ati Nephi i ni'a i te hoê tamaiti apî, o Moromona, no te arata'i e no te faauru ia ratou (hi'o Moromona 2:1-2). I teie mahana, te hi'o atu nei matou ia outou ia riro outou ei puai rahi no te Ekalesia e ei puai no te maitai i ni'a i te fenua nei. Tera ta te Fatu e tia'i nei.

IV. Ia riro ei taata autahu'araa haapa'o

Te faaite papû nei au e, e ite outou i to outou aau ia tau mai te mea e, e riro outou ei taata autahu'araa haapa'o. E

imi outou i te rave'a ia mâ roa outou e ia utuutu i te oro'a mo'a ma te ti'amâ. E hi'o outou i te mau tamaiti atoa ma te maitai e te faatura. E faatura outou i to outou na metua. E haapae outou i te faaino i te Varua i roto i to outou mau mana'o, te parau e aore râ, te ohipa. E roaa to outou ite i te Fatu, o ta outou ho'i e tavini, e e tautoo tamau noa outou ia riro mai Ia'na te huru.

Te faaite papû nei au e, te ohipa maitai ta outou e rave i roto i te Autahu'araa a Aarona, e tau i te reira i te oraraa o te feia ta outou e tavini nei. Te vai ra te taata e titau nei i ta outou tavini autahu'araa. Te hinaaro nei to outou utuafare ia outou. Te hinaaro nei ta outou pûpû ia outou. Te hinaaro nei te Ekalesia ia outou. Te hinaaro nei te ao nei ia outou.

E mea rû te faaotiraa outou i ta outou hopoi'a i te Atua. Te ti'aturi nei au e, e na reira outou.

Tau matahiti i ma'iri a'e nei, i te hoê po'ipo'i to'eto'e, te horohoro ra vau na te pae anavai o Tagus River i Lisbon, i te fenua Potiti. Ua tae mai au i piha'i iho i te hoê tii haamana'oraa i te mau taata ratere ma'imi no te fenua Potiti no mutaa iho ra. Ua faafaatea vau, inaha, te ti'a maite maira te mahana e ua hiti i to'na mau hihhi mahanahana i ni'a i taua tii rahi ra e i ni'a ia'u. Ua tupu te faaururaa i roto ia'u a hi'o ai au i te hoho'a mata patutuutu o te mau taata ma'imi i te hi'oraa i ni'a i te pape. Teie te mau taata tei hinaaro e rave i te mau mea o te ravehia e te hoê faito iti o te taata. Ua vaiho ratou i te hoê ao matarohia e te au maitai, e ua reva ma te itoito na ni'a i te moana matarorehia no te ma'imi i te mau fenua apî. Ua tau i ratou i te ao nei.

Te ite nei au ia outou ia haamana'o ana'e au i taua ofa'i haamana'oraa no te mau taata ratere ma'imi itoito. Te ite nei au ia outou i roto i te hoê tere no outou ta te tahi noa mau taata rii e faaoti ia haere. Te ite nei au ia outou i te faaotiraa i ta outou hopoi'a i te Atua.

Te pure nei au ia haroaroa tatou paatoa i te faahiahia o te Autahu'araa a Aarona e ia ti'aturi, mai te Atua i ti'aturi ra, i te feia e mau nei i te reira. Na roto i te i'oa o Iesu Mesia ra, amene. ■



Na te Peresideni Dieter F. Uchtdorf

Tauturu Piti i roto i te Peresideniraa Matamua

Tamau noa na roto i te faaoroma'i

Na te mau haapiiraa ta tatou e apo mai no roto mai i te faaoroma'i e faabotu i to tatou buru, e faateitei i to tatou oraraa, e faateimaha i to tatou oaoa.

I te mau matahiti 1960 ra, ua haamata te hoê orometua haapii no te fare haapiiraa teitei no Standford i te hoê ma'imira ite no te tamata i te puai o te feruriraa o te mau tamarii e maha matahiti te paari. Ua tuu oia i mua ia ratou te hoê monamona (marshmallow) e ua parau atu ra ia ratou e e nehenehe ta ratou e amu i te reira ihoa taime aore râ, mai te mea e tia'i ratou e 15 minuti, e nehenehe ia ta ratou e farii e piti marshmallow.

I muri iho ua vaiho oia i te mau tamarii ratou ana'e e ua mata'ita'i i te mea e tupu ra i muri mai i te hoê hi'o. Ua amu te tahi mau tamarii i te marshmallow i te reira ihoa taime ; te tahi atu o ratou ua tia'i ia na tau minuti noa e ua topa atu i roto i te faahemaraa. E 30 ana'e o ratou i ni'a i te hanere o tei tia'i.

E tamatamataraa ite noa teie e ua rave te orometua haapii i te tahi ê atu mau ma'imira, no te mea, mai ta'na iho i parau, « e rave rahi te mau mea ta outou e nehenehe e rave no ni'a i te mau tamarii e tamata ra ia ore e amu i te mau marshmallow. » I muri mai râ, ua apee oia i te mau tamarii e ua haamata i te ite i te hoê tu'atiraa tei faatupu i te anaanatae : te mau tamarii tei ore i noaa

i te tia'i ua fifi ia ratou i muri iho i roto i te oraraa e ua rahi to ratou mau fifi i roto i to ratou huru oraraa, e te mau tamarii tei tia'i ua riro ia ei mau tamarii anaanatae a'e e te maitai, tei manu'ia a'e i te haapiiraa e tei aufau maitaihia, e e mau aarua maitai a'e to ratou.

Te mea tei haamata na roto noa i te hoê tamatamataraa ite i ni'a i te mau tamarii e te mau marshmallow, ua riro mai ia ei titorotororaa tei faaite mai e, te aravihi no te tia'i – no te faaoroma'i – o te hoê ia tapa'o o te faaite mai i te manu'iraa i muri iho i roto i te oraraa.¹

E nehenehe te tia'iraa e riro ei ohipa paari

E nehenehe te tia'iraa e riro ei ohipa paari. Ua ite te mau tamarii i te reira, e te mau taata paari atoa. Te ora nei tatou i roto i te hoê ao te vai nei te tamaaraa vitiviti, te haaponoraa i te poro'i i te reira iho taime, te mau hoho'a teata na ni'a i te aniraa, e te mau pahonoraa oioi i te mau uiraa faufaa ore aore râ te mea hohonu. Aita tatou e au i te tia'i. E ite te tahi i to ratou faito toto (tension) i te maraaraa ia nuu mârû noa ana'e to ratou reni tia'iraa i te fare toa i te tahi atu mau reni tia'iraa i piha'i iho ia ratou.